


客杭日記

柳田文庫

文庫11

D 314



容誠日誦  
小曉天陽書

文庫 11  
D 314

010190566396

元郭天錫著

客杭日記



柳田泉文庫



郭雲山日記鏤版五片區為十八頁原係洛人  
百漢陰之家什也事具刻引客臘黑門街書賈  
星架堂主者來為余謀竟以漢陰之辭致之因  
獲而藏弄即謙以蕪眉山書羅池庵碑墨掄一  
軸始余在東武聞知不足齋叢書就中手鈔茲  
書乃每八篇出蜀函記同駢為一冊子常以巾  
箱相從思到則攤以是為樂第恨鳳皇山故宮  
寺壁一絕第三句空五字今較此刻亦空五字  
意所鈔本同耳無復別本可校售按康題徽宗

畫像詩去玉輦宸遊事已空尚餘奎藻繪春風  
年年花鳥無窮恨盡在蒼梧夕照中屬序所謂  
數字不同豈謂是詩邪余酷好茲書也不欲獨  
之遂雇工印之將攜歸以遺同嗜或恐後世不  
能知版片所繇來故特識卷末以視兒姪輩且  
明漢陰能不我靳也文政戊寅夏六月湘江四  
雄操觚于京寓之紅蕖書屋晴窓



雍正乙巳春三月六日客揚州飲于程松門七芙蓉  
閣同會者為里中友江硯南酒半松門兄子岷東出  
觀所藏元京口郭天錫先生日記真蹟共四冊行楷  
精妙奕奕有神中有至大戊申客杭一冊時燭邊醉  
眼觀之不甚記憶後十餘日耿耿于胸因亟從叟硯  
南借鈔硯南亦有同好即往言之岷東岷東殊不秘  
也攜至予寓舍呼燈捉筆寫成草本略汰其無繫武  
林典要者細讀之則杭之耆舊大半皆在往還而坊  
陌橋道琳宮梵宇去宋不遠壯麗深嚴可想見焉遊

鳳凰山故宮一段載白塔以碑石爲基猶有進士題名金銅鐘一口上有淳熙改元曾純甫覲篆銘則他書俱未載此信乎百聞不如一見也寺壁題詩與程史所紀康伯可題徽廟御畫扇略有數字不同想是後人所改耳先生去今三百餘年偶然攢筆完好無恙而適遇予兩人皆杭人鈔而傳之似乎有待者若岷東不怙希世之藏公之于人使後之述風土者有所攷皆不可以不記也三月廿六日杭東城厲鶚

刻引

余曩于友人丁南洋鶴橋寓舍見其所藏元郭天錫客杭日記文簡意約劄記之體具焉余心善之意欲借寫翻鑄無何南洋辭世琴書返鄉是書亦併遠徙他求之未有獲也歲丙寅余嬰疾瀕死百事皆廢惟賓友塵談之餘間僅憑几攤書適聞所知新購知不足齋叢書亟請借覽之且鈔是書于其中點句付梓於是向日之願始遂焉但其間字畫不能無魯魚之疑然斯書世之所希別無他本可參校因姑存疑以

就刊布博雅君子幸其有正焉爲題數言文化丁卯  
季秋平安百俊德識于梧竹草堂

客杭日記

元 京口 郭昇 天錫

至大戊申九月初一日 燒壽星紙 拜親 路遇  
雲公顯舍人握手話去年此日在邳州道中時相  
與一笑

初三日雨 陳和父來錄示新文 小窗兀坐誦滿  
城風雨近重陽之句誰共慰予岑寂耶

初六日晴 李仲謙攜紙求書畫蘭 過五條街遇  
陳景南同訪陳響林出示小米手幅軸臨李伯時

馬雪林行虎三卷塔海公物也

初十日晴 登甘露寺見本長老留酒午麪仍求書  
放翁水調歌孫楚望摸魚子二詞于多景樓下壁  
上又以紙求書遺教經四十二章經瀉山警策證  
道歌

十二日晴 爲甘露本無傳長老鈔經客有惠杭州  
潘又新筆者書小楷數千而不伐可愛可愛

十四日晴 訪盛季高出示李重光墨竹鷓鴣希遠  
墨梅古木房明仲同茶

九月十六日晴 晚趨呂城夜航作錢唐之行

十七日午前抵呂城壩下倒換小舟至奔牛復換小  
舟晡時至常州入城元豐橋見白湛淵提舉值出  
江陰未回乃子无咎无華留飲同白无咎到太平  
寺觀壁上畫水中作一筆繞之不斷立視久之若  
洶湧生動之意奇筆也

十八日晴 同无咎回蔡德甫禮留小酌煮鱉蒸芋  
次别无咎昆仲登夜航之姑蘓有北客喧呼至  
一更乃睡

十九日午後抵平江見龔子敬山長父子留宿其晚  
飯飯已留燈夜話是夕多蚊

二十日晴 飯罷登航解后杭人潘伯起呼酒酌之  
蓋在大都時曾相識故也共上船行

廿一日晡時上長安買飯

廿二日四更到杭州城外霜月滿天寒氣逼人候北  
關門接待寺鐘動換舟入城拂明潘伯起送予歇  
于施水坊橋梳頭沈待詔之樓遇金壇尹子源同  
寓 橋東訪趙伯可儲叔儀 到江浙省中照磨

所見李叔義 省西見張菊存下龔子敬書會張  
松澗府判 同茂之到長生老人橋過紀家橋解  
庫門首見吳若遺提點

至大元年戊申九月廿三日客杭晴 早過井亭橋  
解后張雲心府判 次遇湯北村同知張景芳學  
正 到京同觀見吳若遺若遺有他事令師孫羅  
康伯相接具早飯鄭表白同集栢窗鄭君之子也  
飯已入壺中林壑次開北斗殿看李息齋所畫松  
二株于壁間 見李伯玉改所幹之文約來日子



省中見其子<sub>下</sub> 出北關門湖州市妙行寺中尋伏  
維那已于昨日登天目山矣徒有悵快寺僧宗兄  
供紙雷數字而退觀正殿佛三尊偉甚中設毘盧  
遮那佛像殿前止有藏一座次入法堂有碑石數  
本云喻彌陀神筆所畫佛像傍刻本末不暇記也  
次禮古觀音像相傳唐朝塑者兩邊畫壁以屋暗  
不可細覽門有放生池俗云接待寺者卽此院也  
回路足行倦甚坐小舟而還 趙伯可來 寓樓  
頗潔便于坐臥大抵杭城樓居相連自有一種風

韻耳 婺州孔君立來聞孔提舉新除 晚見唐  
仲文外郎出示米老研山圖

九月廿四日客杭晴 早到省中照磨所見李叔義  
改抹元文 到儒學提舉司攜李兄書見王一初  
都目投呈子會王壽之王子芳任伯和是日分付  
該吏金君玉承行 次約金君玉毛令史市樓小  
集 兩作 湖上兜率寺見趙子昂學士不遇乃  
姪趙仲美具茶訖致意

廿五日陰客杭 尹子源約小飲是夜客樓暄甚必

雨作也

廿六日陰客杭 結縛橋西前洋街回謁湯北村同  
出訪張晴川次見崔進之回北村具酒午麪免書  
數紙屏褶高彥敬古松一株可愛窗外矮橘數樹  
結子無數壓枝欲折若吾鄉則無此也飲散由大  
街轉歸 張菊存來 吳茂之來值出 今日見  
北村說葛元白曹梅南戴祖禹金子仁胡穆仲皆  
爲古人可惜再到杭城愈覺舊游之落落也

九月廿七日陰 寓杭 早到省中見李叔義 次

到儒司見周都目以官吏未允所請歸家寫狀再  
到省中見張德輝德輝約晚來說話是日于省卷  
中檢尋學錄解由方見 晚晴登吳山下視杭城  
烟瓦鱗鱗莫辨處所左顧西湖右俯浙江望故宮  
蒼莽獨見白塔屹立耳次謁伍子胥廟轉至拱北  
樓卽朝天門行大街官巷而歸 茅山書院山長  
赤盞象賢金壇教諭王竹所來茶罷同見趙伯可  
尹子源相過夜話

廿八日晴客杭 鄉人吳君用來 訪湯北村 訪

吾子行出所作無稽集皆戲談也 京同觀見趙  
子昂時郝左丞坐正席子昂問都下事 游開元  
宮舊楊駙馬宮也深邃可愛正殿曰景命萬年之  
殿 晚見張德輝看省卷又作學錄教諭擬倒矣  
託其宛轉未知可行否 浼人幹事不料其相誤也  
廿九日客杭晴 早到省中見張德輝李叔義 訪  
王成之不遇再到省中禮房爲立擬劄事 到儒  
司司官不出獨吏輩兀坐司房而已 訪張竹村  
書樓觀諸公詩牌 湯君白來同游昭慶寺看新

塑佛像 次入廣化院 次遊仙林寺寺中無可  
觀者相近一術士之女談星說命若懸水然 次  
與君白午飯君白具茶茶已自觀橋行至官巷而  
歸

三十日陰客杭 早到省中禮房見張德輝李叔義  
是日改正擬劄 同君白出遊宗陽宮時裝塑未  
就 次遊新宮佑聖觀看擁壁二十四堵皆新畫  
也 路遇胡石塘主簿煎魚沽酒會尹子源沈六  
郎 晚見德輝約來日省中計會選本 晚雨暄

甚 夜雨生寒 大德十一年二月十七日禮房呈

奉省堂鈞旨連送選房于學正山長內任用者

至大元年戊申十月初一日雨 客杭城施水坊橋

東岸沈氏樓

初二日雨終日客杭 到省中付文書與選房以木

照元除又欲刁蹬張德輝宛轉言之 到儒司大

雨中止有武老兀坐廳上諸吏無來者 湯君白

李君德來算範圍數次同到官巷問茶茶已訪周

君遠道士次到君德家出子固墨戲聞看者已分

路各歸

初三日又雨 客杭 到省中見李叔義 伺候也

先伯提控不出 同尹子源見儲叔儀畱小酌次

同叔儀到子源寓樓開尊薦亥首 德清吳菊泉

相遇夜話子源同問茶具公至元廿七年赴北寫

金字經者

初四日乍晴 燒京壇紙 宗壽卿來言來日有人

歸鎮江付家書

初五日陰 午同小王覓舟到北新橋覓方仲明不

見空費船錢一貫二百五十大雨只得急回。到龍舌頭西去。湊沙坑見馬從簡外郎言。乃事未允所請。回見德輝言。來日當爲著語。不必出也。付後司使用。吳菊泉見過夜話。

初六日雨不可出。寓杭。儲叔儀隔河樓上見呼出紙索書具酒晚飯。

初七日雨客枕。李君德湯君白來攜紙索書就送紙一幅訪吾子行求篆字閒話久之惠印色方路遇胡石塘

至大元年十月初八日雨客枕。見張德輝于省中遊淨慈寺禮寺看羅漢五百尊訪朱敬齋。

初九日晝晴。客枕。早見鄭鵬南廉訪。次會柯以善以善留三酌。劉悅心張景芳寫篆字丘秀才續至丘枕人吾子行之高弟也。訪吾子行不遇儲叔儀以今日登舟還義興相呼午飯出紙求字。尹子源請薦海菴話至二鼓。

初十日陰。早見鄭鵬南廉訪。見柯以善到省中盛親家見借鈔一笈以今日歸不及作別。晚

到省中伺候吏輩到新宮橋見井同知浼于郭都  
事處著語

十一日又雨 溼熱 早湯北村招早食坐客方仲  
明家與之父子 次同方舅到下馬婆巷見李君  
實新授宜興都目茶罷拉往新門具麪 晚見馬  
公猶未慨然 次見德輝急步而回汗流溼衣幹  
事未成殊焦煩也

十二日客杭 朝天門訪張雲心州判留坐具午酌  
薦糖鱸雞麪 兩作取傘乃回

十三日雨客杭 張景芳送紙求書吳興虛徹道人  
詩偈道人費氏景芳之曾祖母云 遣王二到湖  
州幹事作趙文卿陳有之書

十五日客杭城施水坊橋沈六郎樓 先妣憫忌日  
十六日又雨 客杭 張雲心遣僕寄書來雨中約  
相過彼此客況蕭索耳 到省中伺候吏輩

十七日晴 客杭 王二自湖州回 路遇賈景顥  
紀祥甫周謙甫 鄰樓尹子源得財賦府文書了  
辨可喜予滯留日久所幹未就愈覺憂悶耳 晚

尹子源燒紙招夜飲坐客余及沈及之沈國寶沈  
六郎父子

十八日晴 客杭 早到開元宮見王眉叟提點不  
遇徒弟徐雲谷相接 到小偃門回謁張仲美知  
事不遇 是日游大般若寺寺在鳳凰山之左卽  
舊官地也地勢高下不可辨其處所 次觀楊總  
統所建西番佛塔突兀二十丈餘下以碑石甃之  
有先朝進士題名并故宮諸樣花石亦有鐫刻龍  
鳳者皆亂砌在地山峻風寒不欲細看而下 次

遊萬壽尊勝塔寺亦揚其姓者所建正殿佛皆西  
番形像赤體侍立雖用金裝無自然意門立四青  
石柱鐫鑿盤龍甚精緻上猶有金銅鐘一口上鑄  
淳熙改元曾覲篆字銘在皆故物也行至左廊記  
得壁上一詩云玉輦成塵事已空惟餘草木對春  
風憑高 日斷蒼梧夕照中寺門俗云  
望江亭俯視錢唐江水大略與揚子江同但隔岸  
越山蒼翠差勝耳遠見西興渡口烟樹如薺 次  
遊新建報國寺行至殿後有塊石僅留二十餘字

僧子別立一木牌云五十年前理宗夢一老僧曰後二十年乞一住足地恍然夢覺今築地得此石却無年代可攷昔梵刹而爲王宮今茲復爲梵刹如波入海以予觀之亦好事者爲之也且朝代之廢興皆天也二僧入君王夢中孰記而傳之耶浮屠之說妄矣傍有二客相與一笑而回

十九日晴客杭 三橋早飯飯已見吾子行寫篆字相送仍取玉簫爲予吹數闋子行隱居不仕時能道滑稽語亦近來罕有 再到省中乃事少見次

第

二十日晴 客杭登吳山城隍廟壁畫二鬼頗得回立門首左顧西湖右觀大江杭郡人家皆在足下次遊玄妙觀門立徽宗御書碑石殿前立高宗御書道德經石刻經幢二亭覆之後有真武觀記開平二年物也有老道士云吳越時已有之昔爲紫極宮惜前朝碑石有天慶觀字皆鑿去不存殊失古意且朝代更改勃額曰玄妙當存其已往而新其方來可也道士俗物大敗人意回到省中石



路高下足力少倦

廿一日晴 客杭 湯秋巖來邀飲紅酒次送秋巖  
至蘭陵坊分路 方仲明寄紙求書畫情緒不佳  
遲一二日下筆 燒玄壇香囑告乃事

廿二日晴 客杭 湯君白來同到府學見李霽峰  
教授次見張晴川次見湯北村會韓竹間 晚濕  
三海雲山長 晚香

廿三日晴霧 客杭 早冒霧到馬婆巷見李君實  
託馬惟良見張士瞻說話 到寶祐坊佑聖觀橋

西回謁胡則大不遇

廿四日陰 客杭 湯北村費渙夫來費公鄉人也  
年六十三

廿五日晴 客杭早到省中架閣庫幹事未就而回  
遇蘇厚齋杭之號醫者也約市肆小飲

廿六日客杭早重霧 早見唐仲文不遇爲長興欠  
俸囑呈文催討 盛親家公自長安來同西盛壽  
一哥及二鄉人相訪盛親家公約到芳潤橋午麩  
壽一哥及同集

廿七日客杭 到省中伺候書卷已完馬生改抹但  
咨省而已 晚見馬生云非不用力首領官不從  
奈何願退元物不曾收 歸家悶甚奔走兩月今  
日壞盞

廿八日 晚燈下坐久謀之無計更遲二日且往長  
興索俸作歸耳

三十日晴冷 湯君白知予事不如意呼舟過湖閒  
行散悶遊南山惠因華嚴寺次遊開化院次遊石  
屋洞深暗不可測覺陰氣逼人壁上記姓名而回

入勝果尼寺君白令親惟德母子爲尼延坐設  
茗罷次遊水樂洞扣寺門久之乃得入遠寺皆奇  
石有亭扁曰聲在寺後缺一字泉滴洞中相應鏗然  
有聲故名亭有石刻坡翁東陽水樂亭詩觀畢而  
下踏石上黃葉拔逕邊古松山林間自有一種清  
氣借筆題云至大元年十月卅日京口郭天錫同  
湯君白來此聽泉寺僧具茶飲之清甘卽此水也  
更過一二僧寺以心緒不佳不及詳記泛湖而還  
西北風起同君白錢唐門小酌分路

至大元年戊申十一月初一日

初二日晴 客杭到省中領文書取回甘結 同子

長見吾子行就別 次別湯北村 晚見馬生了

結乃事 晚邀子長小酌囑照元除事 別李叔

義

初三日早別張德輝 同沈六郎買人事

初四日晴 離杭州 唐涇晚飯 夜行

附載

至大戊申十一月十五日客長興訪欽察公出宣和

御府黃居采雪雀圖用雙幅絹畫角上添金龍長  
可六七寸圍葫蘆御書并內府圖書二印雪樹數  
株凍雀上下下復作二鵝鴿真奇物也

十一月廿四日巳卯陳元善來約文卿及予到其家  
觀蘇漢臣孩兒四軸具酒三酌

三十日冬至節客長興同沈孤峰陳監鎮袁正甫盧  
希顏沈希古賀呂知州三酌諸公去後呂侯獨留  
予看許道寧溪山漁樂圖上用宣和殿寶後有伯  
幾仲賓子昂三公題李君章物也

閏十一月十三日各長興訪孟雲心出示黃居家  
萱草湖石螭貓二軸蔡月卿物也黃氏父子作石  
用筆橫拖小作圈子俗謂之野鵲翅

至大元年戊申閏十一月十五日五更束裝賦歸早  
離長興午過呂山下松竹蒼翠前一橋曰甫里橋  
人言是陸天隨隱處詩家醞藉猶可想像也

至大二年己酉二月初九日趙伯可相約早飯飯已  
發書請伏虎林首座引領作焦山之行虎林聞呼  
卽至是日春色佳麗江靜無風到山見謙巽中維

那次入方丈見尊無能長老留茶茶已領入具酒  
煮麪坐者予及趙伯可二僧司官伏首座登山之  
頂看塔展目眺望次憇于飛仙亭回見雅淡雲首  
座巽中煎魚具酒小集酒盡伯可先躡度不可回  
先遣諸僕渡江晚陪尊長老虎林淡雲到海門邊  
看日落一瞬萬頃金波蕩搖可謂奇觀散步而回  
尊老旣別仍送酒果到淡雲房小酌次拉虎林巽  
中踏月上羅漢巖坊福東濟禪房佛燈熒然爐香  
未過具茗果間話俯視棲鷗危巢皆在窗下與二

僧月下聽江聲倚樹清論久之洗城市之塵俗也夜宿巽中房虎林共榻

鴨按天錫有詩云揚子江頭風浪平焦山寺裏晚鐘鳴爐香未斷燈花落喚起山僧看月明妙甚即此時作也

郭髯行記篋中收便是滄江虹月舟解道安居好風韻杭人不合異鄉遊

題郭雲山日記真蹟一絕句樊榭山民厲鶚書時

雍正三年四月六日

客杭日記刻成小詩代跋

多情合遣到杭州錦字私箋客裏愁卻羨兩窗饒樂事一尊相喚隔河樓

樊榭風流婉往賢雲山墨妙手親傳錦囊相篋同珍重記取從今五百年予傳樊榭先生手鈔本開雅

尊前歡賞惜匆匆彈指誰留石火踪謂七芙蓉閣燕集諸先輩展放烟雲重過眼可堪還問七芙蓉事詳厲序

玉躡金題走蠹魚都來有願米顛如巾箱乞與新開本津逮人人足秘書

得間居士鮑廷博題時乾隆壬辰六月朔日

虎林烟瓦屋鱗鱗客裏光陰只四旬但說樓居風韻好  
夜來聽雨卻愁人

十日都來五日陰湖山勝槩亦登臨金鐘白塔前朝話  
別有詩情無限深

小劫人間五百年坊橋寺觀半灰烟往時者舊風流盡  
并藉珠囊一例傳

徵君焚榭畢世事蒐羅帳篋如斯苦不多未許清言獨  
珍秘郭髯其奈鮑髯何

錢唐魏之琇同作

京都寺町通松原

勝村治右衛門

大坂心齋橋筋斐太郎町

河内屋喜兵衛

江戸日本橋通二丁目

須原屋茂兵衛

同 通二丁目

山城屋佐兵衛

同 芝神明前

岡田屋嘉七

同 淺草茅町

須原屋伊八

同 本石町十軒店

英屋大助

同 横山町三丁目

和泉屋金右衛門

